

Date – 28/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Labour, Employment, Skill Development and Entrepreneurship (LESDE) Minister Pu Lalnghinglova Hmar chuan Mizo thalai ten India ram huap inelna sanga hlawhtlinna an chan theih nan hmalak a ngai tih a sawi.
2. Vawiin hi World Rabies Day a ni a, nimin khan Mizoram hmun hrang hrangah ui â hri dona ni, World Rabies Day hi hman a ni.
3. South Asian Football Federation (SAFF) U17 Championship-ah India an champion, India hian final-ah Bangladesh an hneh a ni.
4. Tamil Nadu Karur-ah Actor Politician Vijay-a road show lian tak neihah mipui 31 vel an thi.

<><><>

LESDE QUIZ

Labour, Employment, Skill Development and Entrepreneurship (LESDE) Minister Pu Lalnghinglova Hmar chuan Mizo thalai ten India ram huap inelna sanga hlawhtlinna an chan theih nan hmalak a ngai tih a sawi.

Mizo Students' Union (MSU) General Headquarters buatsaih, LESDE UPSC Challenge Inter College Quiz Competition 2025 kharna hun nizan khan Ignite Studio, Khatlaah khar a ni a, Khuallian Pu Lalnghinglova Hmar chuan UPSC Challenge Quiz Competition buatsaih a ni chu lawmawm a tih thu leh Mizo thalaite'n UPSC hnuaia exam hrang hrangte hmachhawn tura chawhphur an ngaih thu a sawi a. LESDE Department hnuaia Mizoram Building & Other Construction Workers Welfare Board (MBOCWWB) chu mipuiin an hriatchian a, an inziahluh a, a hnuaia hamthatna an dawn theihthe an hlawkpui theih nana he quiz hi an sponsor thu leh thalaite'n eizawnna rahbi an tuk theih nana an puihbawm thin thu a sawi a. Quiz-a telte chu an hmalam hun atan duhsakna a hlan bawk a ni.

He inelnaah hian college 14 telin, final round-ah Govt. Hrangbana College, Mizoram Christian College leh Govt. Serchhip College-te an intum a. Pakhatna chu Mizoram Christian College niin, pahnihna chu Govt. Serchhip College niin pathumna chu Govt. Hrangbana College an ni a, champion team-te hian Mizoram Youth Commission (MYC) hnuaia Mission UPSC kaltlangin a thlawnin UPSC coaching an kal thei dawn a ni.

<><><>

WORLD RABIES DAY

Vawiin hi World Rabies Day a ni a, Mizoram sawrkara Animal Husbandry & Veterinary Department, Mizoram State Veterinary Council leh Indian Veterinary Association te ñang ho huaihawtin nimin khan Mizoram hmun hrang hrangah ui â hri dona ni, World Rabies Day hi hman a ni.

World Rabies Day hi kuminah hian Pathianni a nih avangin nimin khan he ni pual hian hun hman a ni a. Lungleiah chuan ui leh zawhte eng emaw zat chu a thlawnin hri danna (vaccine) pek a ni a. Vaccine hi Lunglei Farm Venga District Veterinary Hospital-ah office hun chhungin lak theih reng a ni.

Champhai AH &Vety Dept pawhin a thlawnin Ui â hri venna vaccinne District Vety Hospital-ah an pe chhuak a, hri danna hi Ui 44 an pe a ni.

Serchhip District-ah pawh AH & Vety Hospital-ah World Rabies Day hman a ni a, ui 150 chuang vaccine pek an ni.

He ni hi kum 2007 atang khan kum tin hman thin a ni a. Anti Rabies vaccine hmuchhuaktu Louis Pasteur thih ni champhaphak September 28 denchhinin khawvel pumah hman thin a ni.

Kolasib DVO Dr. K. Lalbiaknungi leh a thawhpuite hmalakna in Kolasib District Vety Hospital-ah khan World Rabies Day pualin Ui 37 te Ui a hri venna (Vaccine) pek ani a, hei bakah hian Kolasib District chhung Bualpuiah Ui 50 vel Vaccine pek a ni bawk.

Lawngtlaiah pawh AH & Vety Complex-ah hun hman a ni a, World Rabies Day hmanna-ah hian Lawngtlai khawpui a ui vulhtu mi thahnem tak ten Vaccine an la a, mithiam ten Uivulhtu kalkhawmte hnenah Ui a hri chungchanga hriattur pawimawh hrang hrangte leh Hri danna, Vaccine pek pawimawhna te kalkhawmte an hrilhre bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

GST 2.0

Sorkar laipuiin GST rate a tihhniam thar chuan lirthei ke hnih nei leitu mipuite tan awlsamna leh hlawkna tam tak a thlen an beisei thu Aizawla lirthei ke hnih nei zuartute chuan an sawi.

Akashvani zawhna chhangin Yamaha-a thawktute chuan an scooter leh bike man bakah spare parts man pawh a tlakhniam vek thu an sawi a. Scooter man to hret ho ah cheng sing 1 sang 3 bawr leh bike-ah cheng sing 1 sang 7 bawr chhoa a man a tlakhniam bakah spare parts man pawh a tlawm vek nghal thu an sawi a. Hei hian an lirthei hralh pawh a tipung hreta an hriat thu an sawi a ni.

Amawii Hero pawhin Akashvani zawhna chhangin GST rate thar avanga lirthei man tlahniam nghal vek chuan mipuite tana hlawkna a thlen dawn thu sawiin a bik takin mi harsa zawk lirthei lei tum te tan chuan GST rate thar avanga lirthei a tlawmna chu hlawk tham tak a nih thu an sawi a. An lirthei tam zawk chu 350cc hnuailam a nih avangin GST hniam hlawkna tel theihna a nih deuh vek thu an sawi

a. Chawhrualin cheng sang 7 sang 8 chhoa an lirthei man a tlawm thu leh lirthei man to hretah chuan a tlawmna pawh a tam ve zel an ti a ni.

Tunhnaia Aizawla lirthei ke hnih nei pung nasa tak electric two-wheeler siamtu zinga company pakhat Ather hralh chhuaktu MST Motors te chuan Akashvani zawhna chhangin anmahni bikah chuan a tir atanga sorkar laipuiin electric hmang lirtheia GST nasa taka a tihtlem, zaa 5 chu tihdanglam lohin an la hman zel thu an sawi a, hetihrial hian miin an scooter thar an leia an vuah tel tur hrang hrang, accessories erawh chu sorkar laipuiin tunhnaia GST rate a tihhniam avangin a man a tlawm vek thu an sawi a.

Lirthei ke hnih nei kan uar em emna hmun, Aizawl khawpuia lirthei ke hnih nei zuar kan biak te hian tunhnaia sorkar laipuiin GST rate a tihhniam avanga an lirthei tlawm hret chu mipuite tan malsawmna tha tak a nih thu an sawi a. GST rate sang avanga scooter man cheng nuai 1 hnuai lam pawh awm ta mang lo kha tunah chuan GST rate thar avangin cheng nuai 1 man tling lo scooter a awm ta fur mai tih an sawi a. Mipui a bik takin mamawhna avanga harsa chung a lirthei ke hnih nei lei ngai si te tan tak pheih chuan a tlawmna man hi a hlawk tham hlawn hle tih lirthei zuartute hian an sawi bawk a ni.

<><><>

U-17 SAFF

South Asian Football Federation (SAFF) U17 Championship-ah India an champion, India hian final-ah Bangladesh an hneh a ni.

Nizan khan Colombo-a Racecourse International Stadium-ah final khelh niin, ram pahnih te hi hun pangngaiah goal hnih ve ve khungin an inhnehtawk a, penalty shootout neih niin India hi goal li goal khat in an chak ta a ni.

India tan hian Mizo rawlthar R. Lawmsangzuala leh Dallalmuon Gangte te chu an feh chhuak a, anni hi midfielder an ni - Gangte hian fina-ah hian India tan goal hmahruai a khung a ni.

<><><>

MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, tum 126-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

Tamil Tragedy

Tamil Nadu Karur-ah Actor Politician Vijay-a road show lian tak neihah mipui 31 velin an nunna an chan. Marathon rally hi darkar thum chuang zet neih a ni a, mipuite chuan actor hi hmuh tumin an pungkhawm a ni. State health Minister M.Subramanian chuan, Karur-a damdawi-in te pui turin Sawrkar chuan a bul hnaia district hrang hrang atangin doctor a ko lut a. Prime Minister Narendra Modi chuan nimin khan Karur, Tamil Nadu-a political rally neihnaah he thil vanduaithlak tak hi a thleng hi pawl a tih thu a sawi a. Social media post-ah an hmangaih chante

chhungkua te chu a tawrhpuì thu sawiin, he hun khirh tak karah hian chakna an neih
theih nan duhsakna a hlan thu a sawi.

<><><>